

KUTIPAN ZAKAT MENERUSI KONSEP WAKALAH: SATU SOROTAN AWAL

Zakat Collection Through The Concept of Wakalah: An Early Study

Raja Muhd 'Azman bin Raja Azam^{1*}
Muhammad Noor Habibi Bin Hj Long²

¹ Calon PhD di Islamic Business School UUM

² Profesor Madya di Islamic Business School UUM

*Corresponding author (Email: mnhabibi@uum.edu.my)

Diterima: 5 Mac 2020, Diproses: 27 April 2020, Diterbitkan: 30 September 2020

Abstrak: Zakat merupakan satu kewajipan yang perlu ditunaikan oleh setiap muslim. Ia berpotensi untuk menurunkan jurang kemiskinan disamping meningkatkan kedudukan ekonomi umat Islam setempat. Namun objektif ini tidak akan tercapai sekiranya kutipan zakat tidak memuaskan. Pelbagai kaedah telah diambil oleh institusi zakat bagi memastikan jumlah kutipan zakat meningkat. Antara kaedah yang giat dilaksanakan oleh sesetengah institusi zakat adalah sistem wakalah yang mana wakil dilantik untuk membantu institusi khususnya dalam kutipan zakat. Walau bagaimanapun kajian ini hanya memberi fokus kepada Lembaga Zakat Negeri Kedah dan Badan Amil Zakat Nasional Indonesia yang telah melaksanakan wakalah dalam kutipan zakat mereka. Kajian ini adalah bertujuan untuk membandingkan sejauh mana keberkesanan pelaksanaan sistem wakalah dalam kutipan antara kedua institusi tersebut. Kajian ini juga menunjukkan bahawa pelaksanaan sistem wakalah memberi impak yang positif sekaligus berjaya meningkatkan jumlah kutipan zakat. Implikasi penting kajian ini ialah pelaksanaan sistem wakalah ini wajar diaplikasikan secara meluas oleh semua institusi zakat bagi memastikan jumlah kutipan zakat mampu menampung dan mengurangkan jurang kemiskinan setempat.

Kata Kunci: *Kutipan Zakat, Agen, Wakalah, Lembaga Zakat Negeri Kedah, Badan Amil Zakat Nasional Indonesia*

Abstract: *Zakat is an obligation that must be fulfilled by every Muslim. It has potential to reduce the poverty gap as well as improve the economic position of local Muslims. However, this objective will not be achieved if the collection of zakat is not satisfactory. Various methods have been taken by zakat institutions to ensure that the amount of zakat collection increases. There are the methods actively implemented by some zakat institutions is the wakalah system where representatives are appointed to assist institutions, especially in the collection of zakat. However, this study only focuses on the Kedah Zakat Board and the Indonesian National Zakat Amil Body who have implemented wakalah in their zakat collection. This study aims to compare the effectiveness of the implementation of the wakalah system in the collection between the two institutions. This study also shows that the implementation of the wakalah system has a positive impact and successfully increases the amount of zakat collection. An important implication of this study is that the implementation of this wakalah system should be widely applied by all zakat institutions to ensure that the amount of zakat collection is able to accommodate and reduce the local poverty gap.*

Keywords: *Zakat Collection, Agent, Wakalah, Kedah Zakat Board, Indonesian National Zakat Amil Body*

PENGENALAN

Setiap muslim yang telah memenuhi syarat tertentu tidak akan terlepas daripada kewajipan untuk mengeluarkan zakat. Ia adalah kerana zakat merupakan salah satu daripada rukun Islam yang lima. Selain itu, tidak dapat dinafikan bahawa zakat juga memberi kesan terhadap perjalanan ekonomi negara.

Menurut Pathmawati (2008), kewajipan zakat merupakan salah satu jaminan sosial kepada masyarakat khususnya terhadap golongan yang amat memerlukan. Zakat juga adalah satu instrumen untuk meningkatkan kualiti hidup masyarakat disamping mewujudkan sifat keprihatinan ummat Islam terhadap golongan yang memerlukan (Khairul, 2017).

Namun matlamat ini tidak akan berjaya dicapai sekiranya jumlah kutipan kurang memuaskan. Untuk mencapai jumlah kutipan yang memberangsangkan dan menyeluruh, institusi zakat tidak boleh bergantung hanya kepada satu kaedah. Oleh itu, institusi zakat harus prihatin dan sedar akan perubahan teknologi yang pesat berkembang.

Di Malaysia, Majlis Agama Islam Negeri (MAIN) sering menjalankan penambahbaikan dan pembaharuan dalam pelbagai aspek sejajar dengan perkembangan teknologi semasa bagi membantu untuk meningkatkan jumlah kutipan. Selain itu, salah satu strategi untuk meningkatkan jumlah kutipan zakat adalah dengan pengswastaan institusi zakat. Institusi pertama di Malaysia yang berjaya diswastakan pada tahun 1991 iaitu Pusat Pungutan Zakat Wilayah Persekutuan (PPZWP) (Faisal, 2019).

Walau bagaimanapun kajian ini hanya meninjau sejauhmana keberkesanan mekanisma wakalah dalam kutipan zakat terhadap Lembaga Zakat Negeri Kedah. Namun kajian ini turut membandingkan keberkesanannya dengan Badan Amil Zakat Nasional Indonesia (BAZNAS) yang juga turut menjadikan wakalah sebagai mekanisma kutipan zakat.

ISU DAN MASALAH KAJIAN

Zakat memainkan peranan penting dalam menuju ke arah negara yang lebih maju dan prestij. Namun ia tidak akan berjaya dicapai sekiranya jumlah kutipan zakat secara formal kurang memuaskan. Justeru, pihak terlibat khususnya institusi zakat haruslah meningkatkan kualiti pengurusan termasuk dari aspek kutipan mahupun agihan (Zarina et al, 2012).

Turut menjadi faktor kepada kurangnya jumlah kutipan secara formal adalah kerana masih wujud di kalangan masyarakat yang cenderung untuk mengagihkan sendiri zakat kepada asnaf (Rusydi, 2016). Tambahan daripada Aidit Ghazali (1998) mengatakan bahawa fenomena ini adalah berpunca daripada sikap masyarakat yang enggan untuk membayar melalui kaunter zakat. Selain itu, wujudnya persepsi buruk terhadap pengurusan institusi zakat.

Walaupun trend kutipan zakat menunjukkan peningkatan setiap tahun, namun ia masih belum memuaskan untuk menampung jumlah penerima yang semakin meningkat. Datuk seri Jamil Khir Baharom menyatakan bahawa kutipan zakat masih ditahap yang rendah jika dibandingkan nisbah penduduk yang layak mengeluarkan zakat (Berita Harian, 2014).

Sehubungan dengan itu, pelbagai kaedah telah dilaksanakan selaras dengan transformasi negara yang kian berkembang bagi membantu meningkatkan jumlah kutipan zakat. Antara usaha yang telah dijalankan oleh majoriti institusi zakat adalah melalui bayaran zakat atas talian (E-Zakat), skim potongan zakat berjadual, kaunter bank, pejabat pos, dan sebagainya. Namun, wujud satu kaedah yang giat dipraktikkan oleh sesetengah institusi zakat adalah sistem wakalah yang mana wakil dilantik untuk membantu institusi khususnya dalam kutipan zakat.

KAJIAN LEPAS

Pada zaman serba moden ini, institusi zakat seharusnya bergerak seiring dengan perkembangan teknologi. Khadijah (2013) berpendapat dalam kajiannya bahawa untuk mencapai hasrat pembayar zakat, kemudahan perkhidmatan penting kerana kemudahan untuk setiap individu berbeza bergantung kepada keadaan setempat. Sebagai contoh pembayar zakat yang berada di kawasan pedalaman yang tiada kemudahan internet atau kaunter zakat dan bank berdekatan. Oleh itu, ia sesuai sekiranya wujud wakil yang membantu mengutip zakat di kawasan tersebut.

Muhsin Nor Paizin (2014) juga merumuskan dalam kajiannya bahawa variasi kaedah bayaran zakat juga merupakan faktor terhadap peningkatan jumlah kutipan zakat. Ia adalah bertujuan untuk merealisasikan impian pembayar zakat dan memudahkan mereka untuk menunaikan tanggungjawab sebagai seorang muslim. Antara yang giat dilaksanakan oleh Pusat Pungutan Zakat (PPZ) adalah melalui potongan gaji berjadual, kaunter bank, kaunter di pejabat pos, mahupun bayaran secara atas talian. Impaknya saban tahun PPZ merekodkan peningkatan terhadap jumlah kutipan melalui pelaksanaan pelbagai kaedah bayaran.

Faisol Ibrahim (2019) menambah dalam kajiannya mengatakan bahawa sistem pengurusan zakat di Malaysia telah mengalami perubahan yang ketara sejajar dengan perubahan teknologi dan kemudahan sistem elektronik. Keperihatinan institusi zakat terhadap perubahan ini memainkan peranan penting untuk mempelbagaikan kaedah kutipan zakat. Andai kata ia diabaikan, ia akan merugikan masyarakat Islam khususnya golongan asnaf yang layak menerima zakat yang berpunca daripada kutipan yang kurang memberangsangkan.

Atiah dan Hairunnizam (2017) merumuskan bahawa sistem wakalah merupakan sistem yang ideal untuk dilaksanakan bagi membantu meningkatkan jumlah kutipan zakat. Seperti yang telah diamalkan oleh Majlis Agama Islam Wilayah Persekutuan (MAIWP), kaedah ini merangkumi empat segmen iaitu individu, universiti awam, syarikat, dan majikan. Pada masa yang sama, MAIWP memantau wakil-wakil yang dilantik melalui laporan yang wajib dihantar. Ini bertujuan untuk mengelakkan rasa ketidakpuasan hati dikalangan pembayar dan pada masa yang sama menunjukkan ketelusan pengurusan oleh pihak MAIWP.

Kajian-kajian ini jelas membuktikan bahawa pelaksanaan wakalah berpotensi untuk mengoptimalkan jumlah kutipan zakat khususnya secara formal. Secara tidak langsung dapat memperkasakan agihan zakat kepada asnaf. Justeru ia dapat merapatkan jurang ekonomi dan pendapatan dalam sesebuah negeri ke tahap yang minimum.

METODOLOGI KAJIAN

Jenis kajian yang digunakan oleh pengkaji ialah kajian dokumentasi iaitu pengkaji mengumpul segala data yang relevan berkaitan setelah penelitian dibuat. Kajian ini juga menggunakan

pendekatan deskriptif kualitatif. Antara bahan-bahan yang terlibat dalam penelitian adalah buku, jurnal, akhbar, laporan tahunan institusi zakat negeri terlibat dan jaga laman web setiap institusi zakat negeri di semenanjung Malaysia termasuk BAZNAS di Indonesia. Selain itu, kajian ini juga melibatkan perbandingan iaitu meneliti persamaan atau perbezaan terhadap data yang dikumpul.

DAPATAN KAJIAN

Pelaksanaan sistem wakalah kian menjadi perhatian oleh majoriti institusi zakat khususnya di Malaysia. Namun masih terdapat institusi zakat yang masih belum menjadikan sistem ini sebagai satu alternatif untuk meningkatkan jumlah kutipan zakat negeri. Pelaksanaan wakalah dalam kutipan zakat khususnya di semenanjung Malaysia dapat dilihat pada jadual berikut:

Jadual 1. Kaedah Kutipan Zakat Harta Melalui Sistem Wakalah Mengikut Negeri di Semenanjung

Negeri (Semenanjung)	Wakalah (Ejen Berdaftar)
Perlis	✓
Kedah	✓
Pulau Pinang	-
Perak	✓
Selangor	✓
Wilayah Persekutuan	✓
Kelantan	-
Terengganu	✓
Pahang	-
Johor	-
Melaka	✓
Negeri Sembilan	✓

Sumber: Laman Web Institusi Zakat Negeri

Merujuk kepada jadual 1, sebanyak 8 negeri daripada 12 negeri di semenanjung Malaysia yang telah mengamalkan sistem wakalah mewakili negeri Perlis, Kedah, Perak, Selangor, Wilayah Persekutuan, Terengganu, Melaka, dan Negeri Sembilan. Ini menunjukkan sebanyak 67% negeri telah pun mengamalkan wakalah dalam kutipan zakat. Walau bagaimanapun sebanyak 33% negeri di semenanjung yang masih belum menjadikan wakalah sebagai satu alternatif kutipan zakat mewakili Pulau Pinang, Kelantan, Pahang, dan Johor.

Namun kajian ini hanya memberi fokus kepada prestasi kutipan zakat di Lembaga Zakat Negeri Kedah. Lanjutan daripada itu kajian ini juga membandingkan prestasi kutipan zakat di Badan Amil Zakat Nasional Indonesia (BAZNAS). Kedua-dua institusi zakat ini masing-masing mengamalkan wakalah dalam kutipan zakat mereka.

LEMBAGA ZAKAT NEGERI KEDAH (LZNK)

Pengurusan zakat di negeri Kedah mengalami transformasi yang hebat sejak ia diswastakan menjadi Lembaga Zakat Negeri Kedah (LZNK) yang menggantikan Jabatan Zakat Negeri Kedah (JZNK) pada tahun 2015. Pengswastaan ini adalah hasil daripada penambahbaikan undang-undang zakat supaya lebih lengkap yang merangkumi semua jenis zakat termasuk zakat padi, pendapatan, perniagaan, simpanan, emas, perak, KWSP dan zakat harta lain yang turut diwujudkan. Transformasi ini menjadikan pentadbiran dan pengurusan zakat lebih teratur di negeri Kedah.

Terdapat dua jenis enakmen yang terlibat berkaitan zakat di negeri Kedah iaitu Enakmen Zakat Kedah 1955 (EZK 1955) dan Enakmen Lembaga Zakat Kedah Darul Aman 2015 (ELZKDA 2015). Namun EZK 1955 telah dimansuhkan dan digantikan dengan ELZKDA 2015. Dalam Seksyen 8 EZK 1955 menyatakan bahawa Jawatankuasa Zakat hanya berhak melantik di kalangan pegawai atau pekerja untuk menjalankan urusan berkaitan pengurusan zakat. Namun dalam enakmen baru dibawah seksyen 19 ELZKDA 2015 menyatakan bahawa LZNK boleh melantik ejen atau wakil secara spesifik untuk menguruskan zakat termasuk kutipan dan agihan (Hafiz, 2017). Oleh itu, sistem wakalah mula diamalkan di negeri Kedah bermula tahun 2015.

BADAN AMIL ZAKAT NASIONAL INDONESIA

Badan Amil Zakat Nasional (BAZNAS) merupakan institusi zakat yang mengurus secara nasional di Indonesia. Ia terletak di ibu kota Indonesia iaitu di Jakarta. BAZNAS berfungsi untuk mengurus, merancang, mengumpul dan mengagih dana zakat, serta bertanggungjawab untuk menyediakan laporan terhadap pengurusan sepanjang tahun.

Indonesia merupakan negara yang secara geografinya agak besar, BAZNAS tidak mampu untuk mengurus dan mentadbir sendiri khususnya kutipan zakat. Oleh itu, BAZNAS membenarkan masyarakat untuk membentuk Lembaga Amil Zakat (LAZ) sebagai wakil untuk melaksanakan urusan zakat. Walau bagaimanapun, penubuhan LAZ perlu mendapat keizinan daripada menteri dan mendapat perakuan daripada BAZNAS.

Selain itu, bagi masyarakat yang ingin menjadi wakil dan bergerak secara individu, mereka wajib menulis surat kepada pejabat agama daerah setempat. Syarat ini telah tertulis dalam Peraturan Menteri Agama Nombor 5 Tahun 2016. Amil zakat perseorangan ini dikenali sebagai Amil Zakat Tradisional. Selain itu, individu yang ingin menjadi wakil perlu mematuhi syarat seperti berikut:

1. Mencatat dan memfailkan segala urusan zakat
2. Mengagihkan dana zakat sesuai dengan syariat Islam

Pembentukan LAZ ini telah tertulis dalam keputusan Mahkamah Konstitusi Republik Indonesia Nombor 86 Pengujian Undang-Undang 2012. Justeru penguatkuasaan sistem wakalah boleh dikatakan giat dilaksanakan bermula pada tahun tersebut.

Jadual 2. Prestasi Zakat Lembaga Zakat Negeri Kedah dan Badan Amil Zakat Nasional Tahun 2008-2017

Tahun	Lembaga Zakat Negeri Kedah (RM Juta)	Badan Amil Zakat Nasional (RP Juta)
2008	51.51	15,355.09
2009	70.9	19,371.18
2010	80.78	23,661.02
2011	106.9	32,986.95
2012	105.8	40,387.97
2013	123.1	50,741.74
2014	134.18	69,868.51
2015	140.39	82,272.64
2016	148.19	97,637.66
2017	173.41	138,096.29

Sumber: Laman Web BAZNAS, Laman Web LZNK, Fisul et al (2017)

Jadual 2 di atas menerangkan jumlah kutipan zakat oleh dua institusi berkaitan iaitu LZNK dan BAZNAS. Data dikumpulkan bagi tempoh sepuluh tahun iaitu bermula dari tahun 2008 sehingga 2017. Data bagi tahun 2018 tidak diambil kerana tidak berjaya memperoleh data yang telah diaudit.

Trend jumlah kutipan zakat masing-masing menunjukkan peningkatan setiap tahun. Berikut adalah peratus peningkatan bagi kedua-kedua institusi zakat.

Jadual 3. Peratus Peningkatan Zakat Lembaga Zakat Negeri Kedah dan Badan Amil Zakat Nasional Tahun 2009-2017

Tahun	Lembaga Zakat Negeri Kedah (RM Juta)	Badan Amil Zakat Nasional (RP Juta)
2009	23%	26%
2010	14%	22%
2011	32%	39%
2012	-1%	22%
2013	16%	26%
2014	9%	38%
2015	5%	18%
2016	6%	19%
2017	17%	41%

Jadual 3 menunjukkan peratus kenaikan kutipan zakat bagi kedua-dua institusi zakat. Namun nilai peratus kenaikan tersebut tidak konsisten malah terdapat penurunan khususnya pada institusi LZNK iaitu pada tahun 2012 sebanyak 1%. Hasil kutipan zakat pada tahun 2012 menurun sebanyak 1.1 juta berbanding tahun sebelumnya. Ini berpunca daripada ketidakpuasan masyarakat terhadap institusi zakat pada tahun tersebut. Antara yang menjadi faktor hasil daripada laporan masyarakat adalah seperti kualiti perkhidmatan kurang memuaskan, agihan zakat tidak telus (Hafizah, 2017).

Manakala peratus kenaikan kutipan tertinggi untuk LZNK adalah pada tahun 2011 sebanyak 32%. Jumlah kutipan yang berjaya dikumpulkan pada tahun tersebut adalah sebanyak RM106.9 juta berbanding tahun sebelumnya sebanyak RM80.78 juta. Pada tahun tersebut Jabatan Audit Negara tidak membuat penilaian terhadap pematuhan standard prosedur sistem kutipan. Oleh itu, pengkaji tidak dapat mengenal pasti faktor peratus kenaikan tersebut.

Seterusnya, merujuk kepada prestasi tahun pertama LZNK diswastakan iaitu pada tahun 2015, peratus kenaikan tidaklah begitu signifikan iaitu sebanyak 5% mewakili jumlah kutipan sebanyak RM140.39 juta. Ia mungkin kerana tahun tersebut merupakan tahun pertama LZNK cuba untuk mengamalkan enakmen baru terutamanya mengenai sistem wakalah. Namun sejak daripada itu, peratus peningkatan kutipan terus menunjukkan prestasi yang positif sehingga yang terakhir pada tahun 2017 mencecah 17% berbanding tahun sebelumnya hanya sebanyak 6%. Oleh itu dapat dirumuskan bahawa perubahan terhadap enakmen baru tersebut mampu memberi impak terhadap sistem kutipan khususnya di negeri Kedah.

Manakala jika dibandingkan dengan peratus peningkatan di BAZNAS adalah jauh lebih tinggi berbanding LZNK. Namun terdapat peratus peningkatan terendah iaitu pada tahun 2015 sebanyak 18% mewakili jumlah kutipan RP82,272.64 juta.

Walau bagaimanapun merujuk kepada tahun pertama sistem wakalah dilaksanakan di BAZNAS iaitu pada 2012, peratus peningkatan menunjukkan pada tahap yang memberangsangkan iaitu 22% mewakili jumlah kutipan sebanyak RP40,387.97 juta. Seterusnya peratus peningkatan terus meningkat sehingga tahun 2014 dan pada tahun 2015 dan 2016 menurun iaitu masing-masing 18% dan 19%. Terkini pada tahun 2017, BAZNAS berjaya menunjukkan peratus peningkatan yang tertinggi sehingga mencecah 41% peningkatan berbanding tahun sebelum iaitu hanya 19%. Jumlah kutipan pada tahun tersebut adalah sebanyak RP138,096.29 juta.

Namun demikian faktor peningkatan di atas tidak dapat dibuktikan secara khusus berpunca daripada pelaksanaan sistem wakalah terhadap kutipan zakat. Ia adalah kerana data yang digunakan adalah data kutipan secara keseluruhan. Selain itu, terdapat pelbagai lagi kaedah bayaran yang digunakan oleh institusi zakat tersebut. Namun sistem ini wajar dikupas dan dibincangkan dalam kajian akan datang kerana sistem ini giat dilaksanakan dan mampu membantu institusi zakat untuk meningkatkan jumlah kutipan di negeri masing-masing.

KESIMPULAN

Hasil daripada kajian ini, ia jelas menggambarkan bahawa variasi kaedah bayaran zakat turut menyumbang kepada trend peningkatan zakat setempat. Tidak dapat dinafikan bahawa pelaksanaan sistem wakalah juga mampu memberi impak terhadap trend tersebut. Selain itu, kewujudan sistem ini mampu untuk memudahkan masyarakat mengeluarkan zakat tanpa perlu

ke pejabat atau kaunter zakat. Seterusnya ia akan membantu meningkatkan jumlah kutipan zakat secara formal dan mengelakkan daripada pembayar mengagihkan sendiri zakat mereka kepada asnaf. Walau bagaimanapun kajian ini tidak dapat membuktikan secara khusus bahawa peningkatan tersebut adalah berpunca daripada sistem wakalah semata-mata. Walaupun begitu, sistem ini sesuai diamalkan oleh semua institusi zakat kerana faktor kepelbagaian kaedah bayaran jelas memudahkan masyarakat secara menyeluruh untuk mengeluarkan zakat. Secara tidak langsung ia juga membantu meningkatkan jumlah kutipan zakat.

RUJUKAN

- Aidit Ghazali, (1998). *Fenomena Pembayaran Zakat Melalui Saluran Tidak Rasmi: Satu Analisis Empirik, dalam Zakat Ditinjau Dari Perspektif Sosial, Undang-Undang Dan Taksiran*. Angkatan Belia Islam Malaysia.
- Hafizah Zainal, (2017). *Tahap Kepercayaan Institusi Zakat di Kedah*. Journal of Humanities, Language, Culture and Business (HLCB). Vol 1: No 4. Hlm 69-77.
- Hafiz Badarulzaman, Alias Azhar, & Che Thalbi Md Ismail, (2017). *Kerangka Perundangan Pentadbiran Zakat di Negeri Kedah: Satu Analisis Perbandingan*. Journal of Global Business and Social Entrepreneurship (GBSE). Vol. 3: No. 6. Hlm 1-9.
- Fisul Ismail, Hairunnizam Wahid, & Ali Noor (2017). *Prestasi Kutipan Serta Pemuatan Standard Prosedur Kutipan Zakat: Kajian di Malaysia, dalam Pengurusan Zakat di Malaysia: Satu Pendekatan Analisis Gelagat*. Universiti Kebangsaan Malaysia: Bangi. Hlm 67-82.
- Atiah Ahmad & Hairunnizam Wahid, (2017). *Kontrak Wakalah dalam Agihan Zakat: Kajian di Majlis Agama Islam Wilayah Persekutuan, dalam Pengurusan Zakat di Malaysia: Satu Pendekatan Analisis Gelagat*. Universiti Kebangsaan Malaysia: Bangi. Hlm 171-187.
- Ram Al-Jaffri Saad, (2015). *Ejen dan Impak Perubahan dalam Pengurusan Wang Zakat*. Prosiding 9th ISDEV. Hlm 361-380.
- Faisol Ibrahim, (2019). *Perbandingan Kaedah Kutipan Zakat Harta oleh Institusi Zakat di Negeri-Negeri Utara Semenanjung Malaysia*. Prosiding KEIZAC 2019. Lembaga Zakat Negeri Kedah. Hlm. 563-576.
- Khadijah. (2013). *Persepsi Pengguna Laman Web LSZ Terhadap Pembayaran Akat Secara Atas Talian*. Jurnal Jawhar. Hlm 111-139.
- Muhsin Nor Paizin. (2013). *Perlaksanaan Zakat Di Wilayah Persekutuan: Satu Pemerhatian Terhadap Operasi Kutipan Dan Agihan Zakat*. Jurnal Hadhari 6 (2). HLM 97-111.
- BH Online. 17 November 2014. *Kutip Zakat 2013 Cecah RM2.2 Bilion*. Dipetik pada 20 Disember 2017.
- Pathmawati Ibrahim. (2008). *“Pembangunan Ekonomi Melalui Agihan Zakat: Tinjauan Empirikal*. Jurnal Syariah, Jil. 16, Bil. 2, hlm 223-244.
- Zarina Kadri, Sanep Ahmad, Ali Noor, (2012). *Zakat sebagai Pemangkin Pembangunan Ekonomi: Ke Arah Negara Berpendapatan Tinggi*. Prosiding PERKEM VII. Jilid 2. Hlm 1263-1273.
- Suprima & Holilur Rahman, (2019). *Regulasi Pengelolaan Zakat di Indonesia*. Jurnal Yuridis. Vol. 6 No. 1. Hlm 132-146.

Ram Al-Jaffri Saad, (2018). *Analisa Penyata Kewangan Lembaga Zakat Negeri Kedah (LZNK) bagi Tahun 2015 dan 2016*. Seminar Kebangsaan Transformasi Sosio-Ekonomi Wilayah Utara Ke 3. Hlm 289-298.

Sarip Adul, Hadi Abd Hamid, & Ibrahim Ismail, (2017). *Amalan Kutipan Zakat Rentas Sempadan Tanpa Tauliah: Satu Penelitian Awal, dalam Memperkasa Kutipan dan Agihan Zakat di Malaysia*. Universiti Sains Islam Malaysia. Hlm. 73-88.

Khairul Azhar Meerangani, (2017). *Potensi Zakat Dalam Pembangunan Umat Islam di Malaysia*. Prosiding Seminar Antarabangsa Pembangunan Islam: Kolej Universiti Islam Melaka.

Rusydi Ramli & Luqman Abdullah, (2016). *Agihan Zakat Terus Kepada Asnaf: Analisis Fiqh dan Kedudukannya di Malaysia*. Labuan E-journal of Muamalat and Society. Vol 10. Hlm. 86.100.

Statut:

Enakmen Zakat Negeri Kedah 1955

Enakmen Lembaga Zakat Negeri Kedah Darul Aman 2015